

BILA SANGKAKALA BERTIUP

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ
أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يُضِلِّ فَلَا هَادِيَ لَهُ
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ
أَجْمَعِينَ
أَمَّا بَعْدُ،

فَيَا عِبَادَ اللَّهِ، اتَّقُوا اللَّهَ أَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketaqwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah mudahan kita diberkati dan dirahmati Allah Subhanahu wa Taala di dunia dan akhirat.

Sidang Jumaat yang dirahmati Allah Subhanahu wa Taala,

Hari kiamat pasti akan terjadi. Ia janji Allah Subhanahu wa Taala yang tiada sesiapa pun tahu bilakah ia berlaku. Rasulullah Sallallahu Alaihi Wasallam sering memperingatkan umatnya tentang kedatangan hari kiamat tersebut. Ternyata tandatandanya sudah tampak jelas berlaku pada hari ini, seakan-akan memberi peringatan jelas tentang betapa hampirnya saat yang dijanjikan itu. Yang tinggal cuma tiupan sangkakala Malaikat Israfil, yang telahpun bersedia meniupkannya

pada bila-bila masa. Maka, apakah yang masih kita lekakan sedangkan saat berlakunya kiamat sudah kian hampir?

Firman Allah Subhanahu wa Taala dalam surah az-Zumar ayat 68:

أَعُوذُ بِاللَّهِ مِنَ الشَّيْطَانِ الرَّجِيمِ

وَنُفِخَ فِي الصُّورِ فَصَعِقَ مَنْ فِي السَّمَوَاتِ وَمَنْ فِي الْأَرْضِ إِلَّا مَنْ شَاءَ اللَّهُ ثُمَّ نُفِخَ فِيهِ

أُخْرَىٰ فَإِذَا هُمْ يَنْظُرُونَ ﴿٦٨﴾

Yang bermaksud: “Dan ditiuplah sangkakala, maka matilah siapa yang di langit dan di bumi kecuali siapa yang dikehendaki Allah. Kemudian ditiup sangkakala itu sekali lagi maka tiba-tiba mereka berdiri menunggu (ketentuan masing-masing).”

Setelah ditiup sangkakala kedua, semua makhluk dibangkitkan dari kubur dan dihimpunkan di padang masyhar sebagaimana firman Allah Subhanahu wa Taala dalam surah Ibrahim ayat 48:

يَوْمَ تَبْدُلُ الْأَرْضَ غَيْرَ الْأَرْضِ وَالسَّمَوَاتِ وَبَرَزُوا لِلَّهِ الْوَاحِدِ الْقَهَّارِ ﴿٤٨﴾

Yang bermaksud: “Pada hari (ketika) bumi diganti dengan bumi yang lain dan (demikian pula) langit, dan mereka semuanya (di padang Mahsyar) berkumpul menghadap Allah yang Maha Esa lagi Maha Perkasa.”

Sidang Jumaat yang dirahmati Allah Subhanahu wa Taala,

Apakah persediaan kita, sebelum sangkakala ditiupkan? Berikut adalah antara perkara yang patut dilakukan sebagai persediaan menghadapi akhirat :

Laksanakanlah perintah yang diwajibkan kepada kita seperti solat, zakat, puasa dan mengerjakan haji bagi yang mampu. Jauhilah segala perkara yang dilarang seperti mensyirikkan Allah Subhanahu wa Taala dengan berbangga mengatakan: “Saya dilahirkan Islam tetapi saya tidak memeluk agama Islam” serta jauhilah larangan yang lain seperti berzina, minum arak, berjudi, berbohong dan lain-lain. Inilah perkara-perkara yang harus kita perhatikan dalam kehidupan kita sebelum tibanya saat kematian atau hari kiamat. Menderhaka kepada ibu dan ayah, menindas golongan lemah, menipu, mencuri, memberi dan menerima rasuah serta membunuh. Mereka yang berdosa segeralah bertaubat kepada Allah Subhanahu wa-Taala dan meminta maaf daripada orang yang mereka aniaya. Jika tidak, mereka bakal menjadi muflis pada hari kiamat.

Daripada Abu Hurairah radhiyallahu-an-hu, Rasulullah sallallahu-alaihi-wasallam bersabda dalam hadis riwayat Imam Muslim dan al-Tirmizi yang bermaksud :

“Tahukah kamu siapakah orang yang muflis?” Jawab para sahabat : “Orang yang muflis itu wahai Rasulullah ialah orang yang habis hartanya dan perkakas rumahnya untuk membayar hutang dan belum juga selesai, sehingga ia tidak punya harta dan perkakas rumah lagi.” Kata Nabi sallallahu-alaihi-wasallam, “Bukan begitu. Sebenarnya orang yang muflis ialah mereka yang datang pada hari qiamat dengan solatnya sempurna, zakatnya yang ditunaikan, puasanya yang penuh, tetapi ia telah memaki ini, menuduh itu, memakan harta ini, menumpahkan darah itu, memukul ini, maka dibayarkan untuk semua itu dari pahala-pahalanya.

Kemudian bila telah habis segala pahalanya sebelum selesai membayar tanggungan hutangnya, maka diambilkan pula dosa-dosa orang yang diganggunya itu dan ditanggungkan kepadanya. Kemudian dilemparkan dia ke dalam neraka.”

Berusahalah untuk menjadi tujuh golongan yang dinaungi serta dilindungi Allah Subhanahu wa Taala pada hari akhirat nanti.

Daripada Abu Hurairah radhiyallahu-an-hu, Rasulullah sallallahu-alaihi-wasallam bersabda dalam hadis riwayat Imam al-Bukhari yang bermaksud:

“Tujuh golongan yang akan dinaungi oleh Allah pada naungan-Nya, pada hari yang tidak ada naungan kecuali naungan-Nya, iaitu : Pemimpin yang adil, Pemuda yang hidup terdidik pada ibadat Tuhannya, Lelaki yang hatinya terpaut pada masjid, dua orang lelaki yang berkasih sayang kerana Allah, bertemu dan berpisah kerana-Nya, Lelaki yang digoda oleh perempuan yang mempunyai kemuliaan dan kecantikan, maka dia berkata;"aku takut kepada Allah", Lelaki yang bersedekah dan menyembunyikannya hingga tangan kirinyapun tidak mengetahui apa yang diberikan oleh tangan kanannya, Lelaki yang berzikir mengingati Allah pada saat bersendirian maka mengalirlah air matanya.”

Sidang Jumaat yang dirahmati Allah Subhanahu wa Taala,

Hitunglah diri sebelum kita diperhitungkan di hadapan Allah subhanahu wa taala. Bersedialah dengan bekalan taqwa, ilmu dan amal soleh sebanyak-banyaknya. Mudah mudahan kita diberi keringanan dalam situasi yang penuh derita dan sukar ini.

Firman Allah Subhanahu wa Taala dalam surah Al-Hasyr ayat 18:

أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا اتَّقُوا اللَّهَ وَلْتَنْظُرْ نَفْسٌ مَّا قَدَّمَتْ لِغَدٍ وَاتَّقُوا اللَّهَ إِنَّ اللَّهَ خَبِيرٌ بِمَا

تَعْمَلُونَ ﴿١٨﴾

Yang bermaksud: “Wahai orang yang beriman, bertakwalah kepada Allah dan hendaklah setiap diri memperhatikan apa yang telah diperbuatnya untuk hari esok (akhirat); dan bertakwalah kepada Allah, sesungguhnya Allah Maha Mengetahui apa yang kamu lakukan.”

بَارَكَ اللَّهُ لِيْ وَلَكُمْ فِي الْقُرْءَانِ الْعَظِيْمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ
وَالذِّكْرِ الْحَكِيْمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيْعُ الْعَلِيْمُ، أَقُولُ قَوْلِي
هَذَا وَأَسْتَغْفِرُ اللَّهَ الْعَظِيْمَ لِيْ وَلَكُمْ، وَلِسَائِرِ الْمُسْلِمِيْنَ وَالْمُسْلِمَاتِ، وَالْمُؤْمِنِيْنَ
وَالْمُؤْمِنَاتِ، فَاسْتَغْفِرُوهُ فَيَا فَوْزَ الْمُسْتَغْفِرِيْنَ وَيَا نَجَاةَ التَّائِبِيْنَ.